

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Tuig XL No. 19
Oktubre 7, 2009
www.philippinerevolution.net

Editorial

Sukton ang rehimeng Arroyo sa pagpabaya sa mga biktima sang kalamidad


Lubos nga nagaunong ang Partido Komunista sang Pilipinas (PKP) sa minilyon nga biktima sang malaparan nga pagbaha kag pag-usmod sang duta bunga sang bagyo Ondoy kag Pepeng sa Metro Manila kag mga prubinsya. Sa atubang sang pagkainutil sang gubyerno Arroyo, nagapanawagan ang PKP sa malapad nga pumuluyo nga magbuligay kag maghulag sa pagtibawas sa mga kalamidad kag kabudlayan.

Nagapanawagan man ang PKP sa

tanang nga rebolusyonaryo kag maki-pumuluyong pwersa nga himuon ang tanang nga masarangan para buligan ang mga nahalitan kag labi gid ang nalisdan subong nga pumuluyo. Sa amo man, dapat maghulag ang pumuluyo para sukton ang rehimen sa kriminal nga pagpabaya sa mga biktima kag responsibilidad sini sa malaparan nga kalamidad nga naagyan sang pumuluyo.

Ginpatampok sang husto sang mga kalamidad nga ini ang labi nga pagkainutil sang mga ahensya sang gubyerno nga maghimo sang madasig kag santo nga ayuda sa mga biktima. Sa kasagsagan sang mga baha sa Metro Manila, linibo ang natulod sa bubong sang ila mga balay kag madamo ang pila ka adlaw nga naghulat sa wala nag-abot nga bulig. Madamo ang napatay kag nailo. Nagabukal sa kaakig sa inutil nga gubyerno ang pumuluyo, labi na ang mga naluwas sa kaugalingon nga pagtinguha kag ang minilyon nga nakasaksi sa lapnagon nga pag-antos sa nagligad nga pila ka adlaw.

Ginhingalitan pa sang rehimen ang pamahog sang panibag-ong bagyo agud pwersahan nga bakwiton ang mga imol sang syudad para kuno makalikaw sila sa peligro. Ginadumilian sila subong nga magbalik sa ila mga payag, samtang wala naman sang aregla-



Mga tampok sa isyu nga ini ...

**Bulig sa mga nahalitan
sg bagyo**

PAHINA 3

**Rebolusyong agraryo
sa kubay sg mga
Manobo**

PAHINA 7

**Report sg ILO sa
paglapas sg rehimeng
Arroyo**

PAHINA 14

do nga sayluhan sa ila. Pila ka pu-
lo ka libo subong ang ara sa mga
evacuation center kon sa diin lap-
nagon ang gutom kag mga balati-
an.

Ang malapad nga kahalitan nga
gindulot sang mabaskog nga buhos
sang ulan sa Metro Manila kag mga
kaingod nga syudad, amo man sa
malapad nga ulumhan kag pangis-
daan nagpatampok sa wala untat
nga pagguba sang kapalibutan kag
pagkalbo sang mga katalunan kag
kabukiran bangud sa komersyal nga
pagtroso. Ginpatampok man sini
ang sobrang polusyon kag iligal
nga mga istruktura nga nagbara sa
mga danaw, suba kag katungan. La-
bi man nagtampok ang bulok nga
imprastruktura, lakip ang mahina
nga sistema sang pagkontrol sang
baha kag paglimpyo sa mga alag-
yan sang baha sa nasyunal nga ka-
bisera kag mga kaingod nga syudad
kag banwa.

Nakita man ang tuman kalain
nga kahimtangan sang pabalay sa
syudad kag ang lubos nga wala
sang suportang serbisyo sang gu-
byerno sa malapad nga lugar kon
sa diin nagaginutok ang kadam-an
nga mamumugon kag imol sa mga
estero, sa higad sang mga barado

nga sapa kag manubo
nga lugar nga madali
bahaon kag maigo
sang iba pang ka-
lamidad. Sila ang
natural kag panguna-
hon nga nag-antos
sang pinakagrabe
nga kahalitan.
Ginlunod kag
gin-anod sang
wala kapares
nga paghagu-
nos sang baha
ang ila mga puluy-an kag halos ta-
nan nga propyedad.

Ang kahalitan nga dulot sang
mabaskog nga ulan kag malaparan
nga pagbaha pamatuod sang labaw
nga kawad-on sang patugsiling,
sang wala renda nga kagarukan kag
pagpabaya sang mga nasyunal kag
lokal nga burukrata, kag sang ba-
ngian nga prayoridad sang gubyer-
no nga nagresulta sa lubos nga ka-
wad-on sang kauswagan sa syudad,
pag-amlig sa kaayuhan sang pumu-
luyo kag ayuda pangkatilingban.

Ang ginatos nga napatay kag
nailo kag minilyon nga naanod, na-
bulag kag labing nahalitan bunga
sang baha kag pag-usmod sang du-
ta biktima indi lamang sang natu-

ral nga kalamidad, kundi sang ma-
dugay na nga mga kagarukan kag
pagpabaya sang rehimeng Arroyo.

Sa atubang sang labaw nga
pagpabaya kag wala ikasarang sang
bulok nga gubyrno nga maabtik
maghatag sang bastante nga re-
sorsa para sa mga biktima, mini-
lyon nga Pilipino ang boluntad
nga nag-amot sang lain-lain nga
porma sang ayuda para mapahag-
an-hagan ang pag-antos sang
mga nahalitan.

Wala sang huya nga gingamit
pa sang pila ka ahensya sang gu-
byerno ang kaugalingon nga inis-
yatiba sang pila ka grupo para pag-
guwaon nga bulig kuno ini sang
gubyrno. Pagkatapos kamasan sa
mga byahe kag luho nanday Arroyo
kag iban pang kagarukan, nasipot
na ang pondo pangkalamidad sang
Malacañang, gani wala na sang ma-
pagguwa sang magbunal ang mga
bagyo Ondoy kag Pepeng.

Upod sa mga pagtinguha sang
lain-lain nga sektor sang pumu-
luyo, nagpahulag ang PKP, NDFP,
mga rebolusyonaryong organisa-
syong masa kag iban pang progre-
sibong pwersa para magbulig kag
magtuwang sa mga biktima. Gin-
manduan sang PKP ang mga lokal
nga yunit sang BHB kag iban pang
rebolusyonaryong pwersa nga
tum-ukan ang pagbulig kag pag-
suporta sa pagsugod liwat sang
produksyon, pagpangita trabaho
kag pagtibawas sang mga nahali-
tan nga pumuluyo.

Sa atubang sang mga hitabo,
seryosong problema subong kag sa
ginaatubang sang minilyon nga
biktima ang labaw nga pag-antos,
wala sang balay, mga gamit, ulum-
han, pangisdaan kag iban pa nga
makitaan sang trabaho. Malaot pa,
natabo ang kalamidad sa tunga
sang malala nga krisis pang-ekono-
mya sa pungsod kag sa bilog nga
kalibutan.

Sa baylo nga haw-ason ang pu-
muluyo sa kabudlayan, labi pa sila



Tuig XL No. 19 Oktubre 7, 2009

Ang *Ang Bayan* ginabantala sa leng-
wahe nga Pilipino, Bisaya, Iloko, Hili-
gaynon, Waray kag Ingles.

Mahimo ini i-download halin sa *Phi-
lippine Revolution Web Central* nga ma-
kit-an sa:

www.philippinerevolution.org

Nagabaton ang *Ang Bayan* sang mga
kontribusyon sa porma sang mga arti-
kulo kag balita. Ginabuyok man ang
mga bumalasa nga magpaabot sang
mga saway kag rekomendasyon sa
ikauswag sang aton pahayagan.

Malab-ot kami paagi sa e-mail sa:
angbayan@yahoo.com

Kaundan

Editorial:

Sukton ang rehimeng Arroyo	1
Bulig para sa mga nahalitan	3
Road users' tax: Pork barrel	4

Madinalag-on nga opensiba

Apat ka suldado patay	5
Mga opensiba sa Samar	5
Mga hangaway ginpasidunggan	6
Rebolusyong agraryo sg Manobo	7
PKM sa Panay	8
Pagpasilabot-US,ginkundenar	10
Pagpanghalit sg estado	11
Report sg ILO	14
Balita	16

Ang *Ang Bayan* ginabantala duha ka beses kada bulan
sang Komite Sentral sang Partido Komunista sang Pilipinas

nga ginapaantos kag ginapigos sang reaksyunaryong gubyrerno.

Sa bilog nga pungsod, labi nga kinahanglanon nga maisulong ang lain-lain nga porma kag pamaagi sang pag-organisa, kahublagan kag paghimakas sang pumuluyo para sa trabaho, pangabuhian kag hustisya sosyal. Dapat lubos nga pangunahan ini sang mga rebolusyonaryo, progresibo, patriyotiko kag demokrati-kong organisasyon kag pwersa sa lain-lain nga pamaagi sa maabot sang ila nga masarangan.

Kadungan sini, bunga sang natabo nga grabeng kalamidad, sa tunga sang padayon kag labi nga pag-

antos sang pumuluyo kag sa atubang sang kawad-on sang anuman nga paglaum nga may mabulig ang nagaharing gubyrerno kag sistema, dapat magpursiger ang mga rebolusyonaryong pwersa sa dugang nga pangpulitika nga pagpukaw, pag-organisa kag pagmobilisa sa nagaribok nga pumuluyo. Dapat pamunuan kag ubayan ang pumuluyo sa pagtuytoy sa banas sang paghimakas kag pagpukan sa bulok nga reaksyonaryo kag papet nga gubyrerno kag sistema, kag sa pagtukod sang matuod nga may balatyagon, maki-pumuluyo, makatarungan, hilway kag progresibong gubyrerno kag sistemang pangkatilingban. AB

Bulig sa mga biktima sang bagyo Ondoy

Bunga sang mga bunal sang bagyo nga “Ondoy” sadtong Sept. 26 nalunod sa baha ang malapad nga bahin sang Metro Manila kag mga kaingod-prubinsya. Naglab-ot na sa 324 ang napatay (123 sa Metro Manila), 38 ang nadula kag masobra P10 bilyon nga kantidad sang mga pagkabutang kag pangabuhian ang nasamad. Tuhtub duha ka milyong pumuluyo ang nadulaan sang puluy-an, kagamitan kag trabaho.

Suno sa Citizens’ Disaster Response Center, nga isa sa mga nau-na nga naghatag sang ayuda sa mga biktima, madugay na nga nag-nipis ang pondo sang gubyrerno para sa kalamidad. Nahibal-an nga P27 milyon na lang ang nabilin sa P1 bilyon nga Calamity Fund para sa 2009.

“Serve the People Brigade”. Samtang, naglunsar sang mga *relief operation* ang mga progresibong organisasyon kag partido para sa mga nahalitan sang bagyo. Suno sa Bayan Muna, nakapanagtag na sila sang *relief goods* sa mga residente sa Metro Manila. Nagbulig man ang Gabriela Women’s Party, ang partido Anak-

pawis kag ang Kilusang Mayo Uno kag ang Kalipunan ng Damayang Mahihirap.

Isa ka *feeding program* kag *clean up drive* ang ginhimo sang Kabataan Party sa Marikina, Maynila kag Quezon City. Nag-inisyatiba man ang mga estudyante sang UP-Los Baños sa Laguna paagi sa pagbuhi sa “Serve the People Brigade”. Sa inisyal nila nga paghulag nakatipon sila sang P25,000 kag padayon gihapon sila sa pagpangita sang mga bulig.

Malaparan ang kampanya sang Migrante sa nagkalain-lain nga pungsod para mangita sang ayuda para sa mga biktima. Nagdagsaan ang mada-

mo nga bulig sa mga upisina sang Migrante sa Hongkong, New Zealand, mga pungsod sa Middle East kag iban pang pungsod nga ginabraham sang mga mamumugon nga Pilipino sa luwas sang pungsod.

Sa kabudlayan nga magpadala sang mga materyal nga bulig paagi sa ila halin sa guwa sang pungsod, ginapakamaayo sang International Office sang NDFP sa Utrecht, The Netherlands nga ginapangabay ang donasyon nga kwarta ang ipadala nga bulig sa “Ondoy Victims Fund.”

Samtang, kadungan sang pagpakig-unong sa mga pamilya sang mga nabiktima sang bagyo Ondoy, nanawagan ang Partido Komunista sang Pilipinas (PKP), National Democratic Front kag mga rebolusyonaryong organisasyon sang bulig para sa mga minilyon nga pumuluyo nga nahalitan sini sa Metro Manila kag 25 prubinsya.

Nanawagan man ang PKP sa tanan nga rebolusyonaryong pwersa nga magbulig sa mga nahalitan sang bagyo. Ginmanduan sini ang mga yunit sang Bag-ong Hangaway sang Banwa sa mga naapektuhan nga lugar nga magbulig sa mga biktima sang kalamidad. Kangot sini suspendido sang pila ka adlaw ang mga taktikal nga opensiba sa mga nasambit nga lugar agud hatagan-dalan ang pagbulig sa mga pangabuhian kag produksyon sang pumuluyo. AB



Road user's tax—pinakadaku nga “pork barrel”

Makapila ka beses nga nagtuhaw ang kontrobersya sa lapnagon nga pagpangawat sang mga pinuno sang rehimeng Arroyo sa higan-teng pondo nga naghalin sa Road User's Tax (RUT) o Motor Vehicle User's Charge (MVUC).

Ang RUT o MVUC buhis sa pag-rehistro sang mga salakyan sa Land Transportation Office. Ang kantidad nga natipon nga nagalab-ot sa P8 bilyon tuig-tuig ginadumalahan sang Road User's Tax Board (RB) nga direkta nakapaidalom sa upisina sang presidente. Halin 2001, nagabalor na ini sang P56.5 bilyon. Ikaapat nga pinakadaku nga espesyal nga pondo ini nga direkta sa upisina sang presidente.

Lain ini sa iban pang daku nga pondo sang guberno bangud indi ini bahin sang nasyunal nga badyet, gani ang paggamit sini wala na nagaagi sa proseso sang pagplano kag pagrebyu sang Kongreso. Wala ini napaidalom sa anuman nga pag-usisa, regulasyon kag pagawdit, bisan sang Department of Budget kag Commission on Audit (COA). Ginatawag ini nga pinakadaku nga *pork barrel* bangud nakabase lang sa kapritso sang mga nagapamuno diri kon diin ini gamiton. Sige-sige nga ginabalibaran sini ang hingyo sang COA nga magsumiter sang mga pahayag sa mga kita kag gastos sini. Makapila ka beses man nga ginplano ini sang Kongreso nga ipaidalom sa pagbadyet kag pagrebyu, pero pirme ini ginabalabagan ni Gloria Arroyo.

Magkahimbon sa pagpanakaw sa pondo nga ini san-

day Rodolfo “Dodie” Puno, nga nagserbi nga *general secretary* sang RB sa malawig nga panahon, kag utod niya nga si Department of Interior and Local Government Sec. Ronaldo Puno nga amo ang nagbutang sa iya sa pwesto kag iban pang upisyal sang RB. Kahimbon man nila sanday Public Works Sec. Hermogenes Ebdane Jr. nga amo ang nagatindog nga tagapangulo sang RB, kag Gloria Arroyo nga amo ang nagtalana sa ila kag nakighimbon pa sa mga pinuno sang RB sa pagpangurakot sa pondo nga ini.

Madamo na sang napasaka nga resolusyon sa Kongreso kag kaso sa korte para imbestigahan ang mga anomalya sa paggamit sang RB. Sini lang nga Marso, nagpasaka

sang resolusyon ang indi magnubo sa 15 kongresista para imbestigahan ang nadula nga pondo sang RB nga gingasto kuno sa nagkalainlain nga proyekto sa ila mga prubinsya. Suno kay Rep. Carlos Padilla sang Nueva Vizcaya, sadtong 2004 nagtigana kuno halin sa RB sang P1 bilyon para sa pagkay-o sang mga kalsada sa Cagayan Valley kon sa diin ang P400 milyon para kuno sa mga kalsada sa Nueva Vizcaya. Pero wala man sang pondo nga aktwal nakalab-ot didto kag wala sang anuman nga nahimo nga pagkaayo sang mga kalsada.

Sa Eastern Samar, may ara kuno nga alokasyon P350 milyon para sa mga *road sign* kag *guard rail* pero wala man sang nakaabot didto nga kwarta kag wala man sang naangkon nga anuman nga proyekto nga ginpondohan halin sa RB.

May ginreport man ang RB nga masobra P1 bilyon kuno nga balor sang mga proyekto sa Nueva Ecija nga ginhatag sa isa ka kumpanya nga nagahingalan Meditech Trade and Development Corp. pero wala man sang makita nga mga proyekto ang kumpanya nga ini sa prubinsya.

Direkta nadalahig ang magutod nga Puno kag si Secretary Ebdane sa pagpangurakot sa P365.8 milyon nga pondo

sang RB paagi sa kontrobersyal nga pagtukod sang 1,800 poste sang suga bilang paghanda sa paghiwat sang pulong nga ASEAN sa Cebu sadtong 2006. Sobrasobra ang patong sa presyo sang nasambit

nga mga poste. Sa aktwal nagabalor lang ini sang P6,737.39, pero ginhimo ini nga tig-P84,000 tubtob P350,000 kada isa. Sini lang, ginbasura sang Ombudsman ang napasaka nga kaso sang ko-



rapsyon kaangut sini.

Sadtong 2005, isa ka pinakabarahal nga gimik ang ginpadihot ni Dodie Puno para mapagwa niya sang madasigan ang P2 bilyong pondo sang RB. Ginpapirma niya ang 70-katawo nga empleyado sang General Secretariat sang RB nga nagbaton kuno sila sang tig-P29.2 milyon nga "bonus" bilang "insentibo" sa ila trabaho.

Pero ang pinakadaku pa nga gingamitan sang pondo sang RB amo ang mga kampanya pang-eleksyon ni Arroyo. Sadtong eleksyon 2004, halos nasipot ang pondo sini sang ibuhos ini sa "Project Oyster", isa ka padihot sang Malacañang para kuno mahatagan sang trabaho (pareho sang pagkaayo sang mga kalsada) ang mga pamatan-on nga indi makaeskwela. Amo man, sa panahon sang eleksyon sadtong 2007, nagpagwa ang RB sang P24.7 bilyon—tatlo ka beses nga mas daku sa koleksyon kag kinaandan sini sa kada tuig—para sa kon anu-ano nga mga kabangdanan.

Nakatalana naman ang kabilugang pondo sang RB subong sa kampanya pang-eleksyon sang guban Arroyo, ilabi na ang kandidato sini para sa pagkabise presidente nga si Puno. Sining Septyembre, kada myembro sang League of Governors of the Philippines nga nag-endorso sa timbangnanay nanday Defense Secretary Gilbert Teodoro kag Ronaldo Puno sa pagka-presidente kag bise presidente ang nagbaton sang dugang nga P10 milyon halin sa RB, maluwat sa regular nga ginatos ka milyon ka piso nga panapanahon nga alokasyon nila. **AB**

ANG BAYAN Oktubre 7, 2009



MADINALAG-ON NGA OPENSIBA SG BHB

4 suldado, napatay sa Agusan del Sur

Apat ka suldado sang Alpha Company sang 36th IB sang Philippine Army ang gilayon nga napatay sang lambatan sang mga Pulang hangaway sang Conrado Heredia Command sang BHB ang ginasakan nila nga trak sa Barangay San Ignacio, Trento, Agusan del Sur sining Oktubre 3. Isa ka riple nga M16 ang naagaw sang mga Pulang hangaway.

Masunod nga adlaw, isa ka pulis ang napilasan sang ambuson sang mga Pulang gerilya ang isa ka komboy sang 1406th Provincial Mobile Force sa Tagbina, Surigao del Sur.

Naengkwentro man sang BHB sang Septyembre 30 ang nagapatruyang tropa sang 26th IB sa matalon nga dulunan sang Barangay Kinampay, Las Nieves sa Agusan del Norte kag Barangay Esperanza sa Agusan del Sur. Isa ang napatay kag isa pa

ang napilasan sa militar.

Ginsalakay naman sang BHB ang upisina sang isa ka sanga sang Dole-Philippines, isa ka multinasyunal nga kumpanya, sa Barangay San Carlos, Valencia City sa Bukidnon sadtong Septyembre 23. Ginkumpiska sang mga Pulang hangaway ang isa ka Thompson *submachine gun* kag isa ka *shotgun* sang mga armadong bantay sini. **AB**

Mga opensiba sa Samar

Baynte'y tres ka suldado sang Armed Forces of the Philippines (AFP) ang napatay kag anum nga iban pa ang napilasan sa mga taktikal nga opensiba (TO) nga ginlunsar sang mga Pulang hangaway sang Bagong Hangaway sang Banwa sa Northern kag Eastern Samar halin Hunyo tubtub tunga-tunga sang Agosto.

Agosto 16. Gilayon nga nagbalik sa ila hedkwaters ang tropa sang 63rd IB nga nag-operasyon sa Barangay Cuenco, Las Navas, Northern Samar matapos maagaw sang isa ka iskwad sang Rogelio Bantilo Command sang BHB ang suplay nila nga pagkaon. Bangud diri, nauntat ang operasyon sang mga suldado.

Agosto 5. Napulo'g isa ka suldado sang 63rd IB ang napatay sang maengkwentro nila ang isa ka yunit sang Silvio Pajares Command (SPC) sang BHB sa banwa sang Palapag. Una nga nakita sang mga Pulang hangaway ang kaaway kag gilayon sila nga nagpusisyon para ambuson ang mga tropang militar.

Hunyo 15-17. Walo ka mga sul-

dado ang kumpirmado nga napatay sa tatlo ka operasyon isnayping nga ginlunsar sang Rodante Urtal Command (RUC) batuk sa 20th IB sa Barangay E. Duran sadtong Hunyo 17. Nagatigayon sang operasyon lagas ang nasambit nga mga tropa matapos harason sang mga Pulang hangaway ang kampo sang 52nd IB sa Barangay San Pascual sadtong Hunyo 15.

Ginreport naman sang Sergio Lobina Command (SLC) sang BHB nga apat ka suldado sang AFP ang napatay sang maengkwentro sila sa Barangay Cagla-an, Dolores, Eastern Samar sadtong Hunyo 4. Naagaw sang mga Pulang hangaway ang inisyatiba sa kaaway bisan una nga nakapalupok ang mga ini. **AB**



Mga Pulang hangaway, sinaluduhan

Ginpasidunggan ni Greg Bañares, tagapamaba sang NDF-Bicol, ang walo ka Pulang hangaway nga napatay sa pagpakig-away sa 8th Scout Rangers Company sa Barangay Mabanate, Pilar, Sorsogon sining Septyembre 25.

Ang mga napatay ginkilala nga sanday Jonathan "Ka Ely" Balasta sang Irosin; Ka Tangkad, Ka Rema kag Ka Rannie sang Castilla; Ka Jun sang Matnog; Ka Teddy kag Ka Rudy sang Bulan; kag Ka Diego sang Casiguran, Sorsogon. Kadungan sang pasidungog, ginpahayag ni Bañares ang lubos nga pagkasubo sang mga rebolusyonaryong pwersa sa ila paghalad sang kabuhi.

Halos 1,200 katawo ang nakiglubong kay Ka Ely bisan nagaulan sadtong Oktubre 1 sa Irosin, Sorsogon.

Sa interbyu sang *Philippine Daily Inquirer*, ginsiling ni Gng. Alicia Balasta, iloy sang napatay nga medik sang BHB, "Wala ako nagakanugon bisan temprano namatay ang akon anak bangud nahibal-an ko nga nalubos niya ang ginpili niya nga kabuhi. Pamatuod sini ang kadamo sang nakiglubong sa akon anak."

Ginkundenar man ni Bañares ang pagkadalagang sang tatlo ka sibilyan sa pagtiro sang militar-isa ang napatay kag duha lakip ang nagabusong, ang napilasan sa insidente.

Ginpasidunggan man ni Bañares si Ka Papay nga napatay sa isa ka inaway sa Manito, Albay sadto man nga adlaw. **AB**

Mga operasyon militar sa Samar, napaslawan

Napulo'g apat ka tropa sang 34th IB kag Scout Rangers ang napatay kag indi magnubo sa lima ang napilasan sa mga aksyong militar sang Bag-ong Hangaway sang Banwa (BHB) sa Samar halin Pebrero tubtub Hunyo.

San Jorge. Lima ka elemento sang militar ang napatay sa isnayping sang isa ka tim sang Arnulfo Ortiz Command sang BHB (AOC-BHB) sang Mayo 28. Sang Hunyo 5, duha ka suldado sang AFP ang napilasan sa duha ka operasyon harasment sang AOC-BHB sa bag-o nga kolum sang kaaway sa Barangay Bay-ang.

Paranas. Isa ka suldado ang napatay sang maengkwentro nila ang isa ka iskwad sang Serafin Pacimos Command sang BHB (SPJ-BHB) sa Barangay Nawi sang Marso 16.

Duha ka suldado man ang napatay kag isa ang napilasan sa operasyon isnayp sang SPC-BHB sa Barangay Anagasi sang Marso 21. Isa pa ka suldado ang napilasan sa isnayping sang SPC-BHB sa Barangay

Nawi sang Marso 29.

Ginlunsar man sang SPC-BHB ang operasyon agaw sang suplay nga pagkaon sang mga tropa sang RSOT sa Barangay Anagasi sang Marso 31 kag sa Barangay Tapul sang Abril 17.

San Jose de Buan. Napatay ang isa suldado sang maengkwentro sang isa ka yunit sang AOC-BHB ang mga militar sa Barangay Calundan sang Marso 25. Isa pa ka suldado ang napatay sang isnaypingon sa Barangay Can-aponte.

Matuginao. Isa ka suldado ang napatay sang lambatan sang yunit milisya ang nagaoperasyon nga tropa sang 20th IB sa Barangay Carolina sang Marso 16.

Jiabong. Isa ka Ingram *sub-machine gun* ang naagaw sang BHB kay Rogel Gabin, elemento sang lambat-paniktik kag grupo sang manugpatay-tawo sang militar sa isa ka espesyal nga operasyon sang isa ka tim sang AOC sa Barangay Cantungtong sang Pebrero 16. **AB**

Militar sa Eastern Samar, indi magpirma sa kasugtanan para tahuron ang tawhanong kinamatarung

NAGBALIBAD ang mga upisyal sang 14th IB nga magpirma sa isa ka Memorandum of Agreement (MOA) nga nagasaad nga pagarespetuhon nila ang tawhanong kinamatarung sang pumuluyo sa mga lugar nga sakop sang ila mga operasyon. Ang kaundan sang MOA wala sang iban kundi mga pagsulit lamang sang mga probisyon sang nagaluntad nga mga layi bahin sa tawhanong kinamatarung nga ginakilala sang konstitusyon sang 1987 kag sang mga pangkalibutanon nga kasugtanan.

Ang pirmahanay himuon tani matapos ang dayalogo sining Oktubre 5 sa Gen. MacArthur, Eastern Samar nga gintambungan sang 600 mangunguma, tiglawas sang Commission on Human Rights, mga tawong-simbahan, mga upisyal sang lokal nga guberno sang Gen. MacArthur kag mga upisyal sang 14th IB. Ang dayalogo gin-organisa sang Alyansa han Nagkarausa nga Parag-uma, Negosyante ngan Barangay Konseho (AKAP NA KAMO).

Suno sa Katungod-SB, sa pagbalibad sang 14th IB nga pirmahan ang MOA, nagapakita man sini sang wala sinseridad nga sakdagon ang tawhanong kinamatarung. **AB**

Rebolusyong agraryo sa kubay sang mga Manobo

Sadtong una wala kami ginakilala bilang tawo sang reaksyunaryong gubyrno. Malala ang diskriminasyon kag wala kami sang gahum. Pag-abot lang sang rebolusyonaryong kahublagan kami ginakabig nga tawo.

-Ka Sot, lider sang Lumad.

Dekada 1950 sang una nga sudlon sang dumuluong nga mga kumpanya sa pagtroso ang matalon nga bahin sang duta sang katigulangan sang mga Manobo sa Mindanao. Gin-angkon kag gindambong sang mga kumpanya nga ini ang linibo ka ektaryas nga kagulangan pagkatapos gindeklarar sang gubyrno nga wala sang tawo nga magpuyo sa nasambit nga mga lugar. Bilog nga komunidad ang natulod sa pusod sang katalunan, nga labi nga nagbulag sa mga Lumad sa nagapanguna nga dalagan sang ekonomya.


Madamo pang mga kumpanya ang nag-upod sa pagdambong, lakip ang mga kumpanya sa pagmina. Gamit ang pwersa militar kag reaksyunaryong layi, padayon nga ginpalayas ang mga Lumad halin sa ila nga mga duta kag nauna nga pangabuhian.

Nagbag-o ang dalagan sang kasaysayan sang mga Manobo sang nag-abot ang mga Pulang hangaway sang 1981. Madasig nga ginhibalo sang mga rebolusyonaryo ang kahimtangan kag mga halambalanon sang mga komunidad. Nag-estorya sila sa mga datu kag naghimo sang mga plano para bawion ang duta sang ila katigulangan. Upod ang mga datu, gintukod nila ang mga organisasyong masa nga nangin palaagyan sang paghulag.

Nag-angkon sang boses ang mga ginagawan sang duta. Ginlunsar ang una kag madinalagon nga kampanya batuk sa pagpangtroso. Ginduso nila ang

ila presensya sa daan nga mga erya sa kilid sang haywey para liwat nga bawion ang duta nga gin-agaw sa ila. Sa katapusan nabawi nila ini kag hilway sila nga nakatanom.

Naatubang ang mga hayagan nga abuso. Napalayas ang mga dumuluong nga kumpanya bangud sa malig-on nga paghiliusa sang mga konseho sa komunidad kag mga Pulang hangaway. Diri nag-umpisa ang binhi sang rebolusyong agraryo sa lugar.



Naghimo sang mga polisiya angot sa pagtroso kag pagmina. Nabun-ag ang makasaysayan nga kasugtanan nga Malanday sa isa ka pulong sang mga pinuno sang tribo sang 1993, kon sa diin gintakda ang mga polisiya pareho sang pagbawal sa pagtroso sa pila ka lugar.

Sistematikong produksyon agrikultural

Sang una nagasalig lang ang mga Lumad sa kaingin, pangisda kag pangayam nga sa kadam-an nakasalig sa dunang manggad sang talon. Sa unang bahin sang dekada 1980, gin-umpisahan sang mga Pulang hangaway ang pagtudlo sang bag-o kag produktibong pamaagi sang pagtanom. Ginpatuman ang programang ekonomyang nagasalig sa kaugalingon umpisa 1987.

Bisan indi nangin madali sa umpisa, wala sang kataka nga gindumalahan sang mga hangaway. Direktang gindumalahan sang Pulang hangaway ang pagtanom, mangin ang pagpanagtag sang mga pananom nga niyog, saging kag abaka sa lainlain nga komunidad.

Bunga sang nasambit nga programa, nagtanom na ang mga komunidad sang Lumad para sa kaugalingon nga konsumo kag ang daan nga pag-saylo-saylo amat-amat nga nabag-o. Nangin mas permanente ang ila lokasyon kag istable ang pangabuhian sang nangin mas sistematiko na ang produksyong agrikultural sang mga komunidad.

Nagtanom sang duha ka tipo sang produkto—pangmalawigan nga tanom pareho sang abaka kag uway nga pangbaligya, kag tanom pangkonsumo pareho sang mga ulutanon. Maluwas sa pagtanom, may ara man nga manukan kag babuyan. Nabatyagan sang masa ang benepisyong rebolusyong agraryo.

Naglapnag ang *hungos* ukon bayanihan. Ginregularisa ang pro-

duksyon sang uway paagi sa organisadong pag-utod sini. Sa isa ka lugar, sa isa ka natalana nga panahon lang mahimo mag-utod para masiguro nga indi masipot ang uway sa komunidad. Nakahimo sang komunal nga talamnan para sa mga organisadong masa kag ila Pulang hangaway, kag may ara man nga indibidwal nga talamnan kon sa diin ginapatuman ang *hungos*. Ginadumilian ang pagprenda sang duta para malikawan ang pagtuhaw sang bag-o nga agalon nga mayduta. Sa pigado nga panahon, ginadumalahan sang komunal nga talamnan ang naprenda nga duta kag ginabalik ini sa napirde nga mangunguma pagkatibawas sini sa utang.

Tunga-tunga sang dekada 1990, amat-amat nga nag-uswag ang pangabuhian sang pumuluyong Manobo. Ang binhi sang rebolusyong agraryo nga ginpanggas sang Pulang hangaway nag-usbong bilang malig-on nga kahublagang masa. Ang organisadong masa mismo ang nagpalapnag sang programa sa mga

kaiping-baryo. Kon sang una lubos sila nga nakasalig sa dunang manggad sang talon, napamanggad sang mga Lumad ang ila duta halin sa kaugalingon nga balhas.

Rebolusyonaryo nga ani

Ang manggaranon nga kasaysayan sang ila paghimakas ang nagserbi nga armas nila sa padayon nga pag-away. Nag-ani sila sang tanan-nga-bahin nga kadalag-an. Naamligan ang kapalibutan, nauntat ang lapnagon nga pagkawasak sa kapalibutan nga dulot sang makahalalit nga pagtroso kag pagmina. Nag-uswag ang organisasyong masa, naglapad ang hilikuton alyansa para pangapinan ang kapalibutan kag duta sang katigulangan tubtob sa pungsodnon nga lebel. Nagbaskog ang gahum sang konseho sang ila mga lider.

Nauyatan nila ang Pulang gahum. Napatalsik sang dekada 1980 ang madamo nga dakung kumpanya sang mga kumpanya nga kumprador. Nabawi ang linibo ka ektaryas nga duta sang katigulangan kag ginpadumala ini sa kolektibo kag

indibidwal nga pagpanag-iya.

Nag-uswag ang pangabuhian sang pumuluyo. Nabudlayan lang sila sa panahon nga may militarisasyon. Pati ang mga settler nakagum man sang mga kadalag-an sang rebolusyong agraryo. Madamo sa imol nga mangunguma nga dumalay-o halin sa mga kaiping nga prubinsya kag isla ang ginpanugutan nga magtanom sa mga nabawi nga duta.

Ginpamatud-an sang manggaranon nga inagihan sang pumuluyo diri nga ang rebolusyong agraryo ang nagabugkos kag nagapalig-on sang paghiliusa sang masa. Sa pihak sang paliwat-liwat nga pagpanghalit sang estado, ginasakdag sang pumuluyo ang kinamatarung nila sa duta sang katigulangan. Yabi diri ang benepisyo sang rebolusyo nga agraryo nga ginaani sa malawig nga panahon sang militante nga paghimakas sang pumuluyo. Ang kadalag-an nga ini nagaserbi nga inspirasyon sa madamo pa nga prubinsya kag rehiyon sang Mindanao. AB

Pagtukod sang Tsapter sang PKM sa Panay

Ang masunod ginkuha sa isa ka artikulo nga ginpagwa sa Daba-Daba, ang rebolusyonaryong pahayagang masa sa Panay. Ginapaambit sini ang inagihan sa pagtukod sang isa sa mga tsapter sang Pambansang Katipunan ng mga Magbubukid sa isa ka prenteng gerilya sa Panay.

Malawig na ang rebolusyonaryong paghulag sang mga pumuluyo sa Barangay Buhay. Apang temporaryong naghina ang ila organisasyon halin sang 1988 tubtob 1996 bangud sa sala nga linya pangpulitika kag masingki nga atake sang kaaway. Liwat nga nagbaskog ang organisasyon sang mangunguma sadtong 1998 sa balayon sang Ikaduha nga Dungganon nga Kahublagan Pagpanadlong sang Partido.

Sa pagsulong sang rebolusyong agraryo ila ginbatuan ang pagpang-agaw sang mga agalon nga mayduta kag sang Philippine Army sang 3rd Infantry Division (3ID). Sa subong padayon nila nga ginatalauma ang halos 1,000 ektaryas nga lupa



nga wala sang arkila. Sadto, ang mga mangunguma pwersado nga magbayad sang arkila sa Philippine Army sa panahon sang tig-alani bangud ang ila lupa ginaangkon sang Philippine Army Reservation.

Ginbatuan kag napaslaw man nila ang pagtinguha sang kaaway nga pahinaon kag waskon ang ila nga organisasyon sang mangunguma kag rebolusyonaryong kahublagan sa kabilugan halin sadtong una nga tuig pa lang sa pagkatukod sini tubtob sa pagpatuman sang Oplan Bantay Laya 1 kag 2.

Natukod kag napalig-on ang sanga sang Partido nga amo ang nagagiya sa organisasyong masa kag milisya sang pumuluyo. Ang mga kadre kag katapo sang sanga sang Partido napanday kag handa sa mga sakripisyo sa pagpatuman sang mga hilikuton sa atubang sang mga atake sang kaaway kag iban pang kabudlayan.

Sige-sige ang partisipasyon sang pumuluyo sa iban pang hayag kag tago nga paghimakas. Sa kamatuoran, nagalab-ot na sa 63% sang kabilugang pamalay ang napahulag. Hugot nga nagabinuligay ang konseho sang barangay sa hayag nga paghulag kag sa paglubad sang problema sang tagabaryo.

Naumpisahan man nila ang kahublagan kooperatiba kag nakabulig ini sa pagpahagan-hagan sang epekto sang krisis sa ekonomya kag pagpanghimulos sang mga agalon nga mayduta kag manggaraan nga mangunguma.

Madamo man ang nahanas nga mga aktibistang masa nga may ikasarang magpamuno sa barangay nga lebel nga paghulag, nag-entra sa Bag-ong Hangaway sang Banwa bilang mga pultaym nga Pulang hangaway kag nangin mga katapo kag kadre sang Partido.

Aktwal nga asembleya. Alas-9 sang aga sang umpisahan ang asembleya. Naghiliusa ang mga delegado sa katuyuan sang pagtili-



pon para mapataas ang lebel sang ila rebolusyonaryong organisasyon halin sa Komite nga Pang-organisa sang Mangunguma (KPM) pakadto sa pagtukod sang tsapter sang PKM. Gintasa nila ang napatuman nga mga hilikuton kag naagyan nga mga problema. Nag-isa man sila nga magpili sang mga katapu sang konseho sang PKM paagi sa sekreto nga balota.

Antes magboto ang mga 80 ka delegadong mangunguma, ginathag ang talaksan kon sin-o ang may ikasarang sa kolektibong pagpamuno. Malipayon sila sa pagpili sang mangin katapu sang konseho sang tsapter sang PKM bangud diri nila aktwal nga naagyan ang tunay nga demokrasya. Diri man nakita ang lebel sang konsolidasyon sang organisasyong masa.

Nagbulig ang mga Pulang hangaway sa pag-isip sang balota.

Pagkatapos magsumpa ang napili nga konseho ginhatagan ang kada isa sang kahigayunan nga maghatag sang ila mga mensahe.

Programa sa paghulag. Pagkatapos makasugtan sang

assembleya ang pagtasa nga ginpahayag sang nagapamuno sa organisasyon, gin-isahan nila ang programa sang isa ka tuig nga paghulag sang PKM. Nagapanguna nga kaundan sini ang pagpadaku kag pagpalig-on sang ila organisasyon, pagpabaskog sang ila kooperatiba kag iban pang proyekto para sa kaayuhan sang pumuluyo. Maglunsar sila sang kampanya sa pagpataas sang produksyon kag mga paghanas angut diri. Padayon man nga sakdagon ang mga kadalagan sang rebolusyong agraryo, labi na ang nakumpiska nga duta kag magaa-mot sila sa kampanya sang pagpaslaw sang OBL2 kag iban pa nga maitom nga padihot sang kaaway.

Sa partikular, padayon nila nga batuan ang pagbalik sang kontrol sang mga agalon nga mayduta sa duta nga ila ginauma kag paslawon ang kontra-rebolusyonaryong padihot sang Reengineered Special Operations Team (RSOT) sang militar kag ang pagtukod sang mga detatsment kag pagrekruta sang CAFGU kag impormer sang kaaway.

Magabulig ang PKM sa pagrek-ruta sang mga Pulang hangaway, maluwas sa paghatag sang iban pa nga suporta sa armadong paghimakas. Maghanas man ini sang mga lokal nga medik kag pagbaskugon ang kampanya medikal nga may tum-ok sa paglikaw sang balatian.

Natapos ang asembleya sang mga alas-5 sang hapon. Pagkatapos matalana ang masunod nga pulong sang konseho sang PKM kag iban pang mga halambalanon, nagpauli ang mga delegado nga mangunguma nga hugot ang ila paghiliusa kag bug-os ang determinasyon nga pauswagon pa ang pagsulong sang kahublagang mangunguma. Gintuytoy nila pauli ang lainlain nga dalan apang isa lang ang ila direksyon—ang pagdaog sang kahublagan mangunguma kag pungsudnon demokratikong kahublagan. AB

PKP, nagpaandam batuk sa pagsingki sang interbensyon militar sang US

Ginpaandaman sang Partido Komunista sang Pilipinas ang US nga in-di paggamiton ang pagkapatay sang duha ka suladong nga US sa Sulu sadtong Septyembre 29 para hatagan-rason ang pagpasingki sang pagpasilabot-militar sa pungsod. Ginaduso man sang PKP ang pag-pahalin sang tanan nga tropang US sa pungsod, ang pag-untat sa operasyon sang 600-katawo nga Joint Special Operations Task Force-Philippines kag ang pagbasura sa bangian nga Visiting Forces Agreement (VFA).

Napatay sa Barangay Kagay, Indanan, Sulu ang duha ka suladong US Special Forces kag isa ka elemento sang Philippine Marines samtang duha pa ang napilasan sang malukpan sang bomba ang ginasakyan nila nga Humvee. Ang mga napatay nga tropang US amo sanday S/Sgt. Jack Martin kag Sgt. 1st Class Christopher Shaw, pareho mga tropa sang 3rd Battalion, 1st Special Forces Group. Samtang, ang isa ka Philippine Marines nga napatay nakilala nga si Pfc Jerwin Estrada.

Suno mismo sa pahayag sang US Department of Defense, ang duha nga napatay nga mga suladong nga Amerikano yara sa Pilipinas para suportahan ang "Operation Enduring Freedom," ang bansag sa teroristang gera nga ginalunsar sang US sa Iraq, Afghanistan kag sa ika-duha nga prente kuno sini sa Mindanao. Ini ang pinakauna nga kahigayunan nga may napatay nga tropa sang Amerikano sa isa ka *combat zone* sa Mindanao. Ang ila nga pagkapatay nagapamatuod nga nagapasilabot ang mga suladong sang US sa kombatan.

Antes ini, 37 elemento sang AFP kag PNP ang napatay sa sunod-sunod nga engkwentro sa tunga sang Abu Sayyaf kag militar sa Indanan halin Septyembre 19 tubtob Septyembre 21.

Siling sang PKP, indi ini ang una kag katapusan nga kahigayun-



nan nga mabuyagyag ang pagsulod sang mga suladong US sa mga *combat zone* kag ang aktwal nga pag-entra nila sa mga operasyon sang kombatan sa Pilipinas.

Nagapanawagan ang PKP sa pumuluyong Pilipino kag Amerikano nga iduso sa gubyernong Obama nga iatras ang tanan nga mga tropa sang US sa

pungsod para malikawan ang pagsingki sang mga operasyon pangkombatan nga ginaupdan sang mga suladong US kag indi parehason ang Pilipinas sa Iraq kag Afghanistan. Suno sa PKP, indi man nagustuhan sang pumuluyong Amerikano nga madalahig liwat sa gera nga pareho sang sa Vietnam War.

Gin-atake man sang PKP ang paggamit sang gubyernong US sa nagtaliwan nga mga kalamidad nga nag-igo sa Pilipinas para hatagan-rason nga kuno mga misyon nga *humanitarian* ang pagpakat sa dugang nga interbensyunistang tropa sang militar, nga subong sa Kamaynilaan kag mga kaiping-prubinsya.

Ginatos nga mga suladong Amerikano halin sa US Pacific Command sa Okinawa ang ginpadala sa pungsod halin sadtong isa ka simana. Sadtong Oktubre 5, duha ka barko de-gera sang US ang nagdungka sa Manila South Harbor sakay ang indi maisip nga suladong kag kagamitan. Sini man nga simana, isa pa ka grupo sang 3rd Marine Expeditionary Force sang US ang nag-abot halin sa Japan. **AB**

Balance Piston Exercises sa Samar, ginatago sa publiko

HUNGOD nga ginatago sang 8th IDPA sang Armed Forces of the Philippines (AFP) sa publiko ang pagsulod sang mga tropang Amerikano nga nag-entra sa gintingub nga paghanas-militar sa Samar sa idalom sang "Balance Piston 2009." Ginlunsar ini sa Camp Gen. Eugenio Daza, hedkwarters sang 801st Infantry Brigade sang Philippine Army sa Barangay Fatima, banwa sang Hinabangan, Samar. Natapos ini sang halos wala sang publisidad sa midya sadtong Agosto 28.

Ang pagtago nga ini sang AFP tuga sang sunod-sunod kag malaparan nga mga hublag protesta nga ginlunsar batuk sa nauna nga paghanas sang "Balance Piston 2009" sa Camp Gen. Macario Peralta, Jr. sa 3rd IDPA sa banwa sang Jamindan, Capiz sa Panay sadtong Enero-Pebrero kag sa mga prubinsya sang Albay, Sorsogon kag Masbate sa rehiyon sang Bicol sadtong Abril. **AB**



Ka Joema, ginkuha sa listahan sang mga terorista sang EU

Ginkuha na ang ngalan ni Prof. Jose Ma. (Ka Joema) Sison sa listahan sang mga terorista sang European Union (EU), base sa desisyon sang European Court of First Instance (ECFI) sa Luxembourg sang Septyembre 30 nga nagbasura sa nauna nga desisyon sang Council of the European Union.

Suno sa ECFI, wala sang katarungan nga ginapabilin sang EU si Ka Joema sa lista sang mga terorista nga wala sang mapag-on nga ebidensya nga nadalahig siya sa anumang akto sang terorismo.

Si Ka Joema indi matarung nga ginpaantus halin sang 2002 bangud sa paglakip sa iya sa lista sang mga kuno terorista. Gindingutan siya nga mag-angkon sang puluy-an, magtrabaho, magbaton sang *living allowance*, may nagakodigo nga *insurance coverage*, magbaton sang *old-age pension* kag magbyahe nga wala sang upang. Suno kay Ka Luis Jalandoni, pangulo sang National Democratic Front of

the Philippines (NDFP) *negotiating panel*, ang indi matarung nga pagkalista ni Ka Joema kag duha ka mayor nga alyadong organisasyon sang NDFP, ang PKP kag BHB, seryoso nga nagbutang sa peligro sa sugilanon pangkalinungan sa tunga sang Gubyerno sang Republika sang Pilipinas (GRP) kag NDFP. Pagkatapos malakip sila sa listahan sang mga terorista sang US, EU kag iban pang gubyerno, ginduso sang GRP sa NDFP nga pirmahan na sini ang bangian nga “pinal nga kasugtaan” para malikaw ang atensyon sang pumuluyo sa tunay nga mga ugat sang gera sibil kag sa kakinahanglanon nga mga reporma nga sosyal-ekonomiko kag pangpulitika.

Ginabalewala sang “pinal nga



kasugtaan” ang 10-punto nga kasugtaan pangkalinungan nga ginhimo sang magtimbang nga bahin kag ginapamilit ang pagpasurrender sang NDFP. Ginpahigad ang malahalona nga demanda sang pumuluyo para sa reporma pangkatilingban, pang-ekonomya kag pangpulitika.

Subong nga nakuha na sang EU sa lista sang mga “terorista” si Ka Joema, punong pulitikal konsultant sang NDFP, pwede magserbi nga paborableng kondisyon sa sugilanon pangkalinungan. Nagpanawagan si Jalandoni sa tanan nga tagasakdag sang kalinungan sa Pilipinas kag sa guwa sang pungsod nga iduso ang liwat nga paglunsar sang sugilanon pangkalinungan kag paglubad sa ugat sang gera sibil.

Sa pihak sini, gina-insister gihapon sang Malacañang nga bisan nabasura na ang mga kaso batuk kay Ka Joema sa iban nga pungsod, nagapabilin gihapon ang mga kaso niya diri kag arestuhon gihapon siya kon magbalik siya sa pungsod. **AB**

Lider-mangunguma, ginpatay sang RPA sa Negros

GINTADTAD sang bala tubtob nga mapatay si Reynaldo Bucaling, 41, tagapangulo sang Pakigdait sa Kalambu-an sa Kambayugo (PSK) kag myembro sang National Federation of Sugar Workers (NFSW), samtang nagaluto sa kusina sang iya balay sa Purok Dalia, Barangay Bug-ang, Toboso, Negros Occidental sining Oktubre 5.

Suno kay Nida, asawa sang biktima, ang mga kriminal nga elemento sang bandido nga Revolutionary Proletarian Army (RPA). Si Bucaling ikaapat nga biktima sang nasambit nga kontra-rebolusyonaryong armadong grupo halin Hulyo sining tuig. **AB**

Nagabusong, napatay sa pagpamomba sang mga tropa nga Amerikano kag AFP

ISA ka 19 anyos ang edad sang babaye nga nagabusong ang napatay pagkatapos ang wala sang pili nga pagpanganyon kag pagpamomba halin sa kahanginan sang gintingub nga mga pwersa sang AFP kag US sadtong Septyembre 20 sa Sityo Tali-bang, Barangay Buansa, Indanan, Sulu.

Suno sa pahayag sang Kawagib Alliance for the Advancement of Moro Human Rights kag Indanan Social Welfare Office, ang biktima nga nagahingalan nga Wilma Ambil ang gilayon nga napatay.

Madamo man nga balay ang nasamad sa pagpanganyon kag pagpamomba. **AB**



Premyadong manunulat, ginapanilagan sang militar


GINAPANILAGAN sang militar si Jun Cruz Reyes, isang progresibo kag premyadong manunulat, propesor sang University of the Philippines kag pintor. Upod ang National Artist nga si Bienvenido Lumbera, isa si Reyes sa mga alagad sang arte nga nagprotesta sa pagpasilabot sang Malacañang sa pagpili sa mga National Artist. Suno kay Reyes, walo ka lalaki nakasakay sa isa ka puti nga *van* ang nagbantay sa gwa sang iya puluy-an sa Sta. Elena, Hagonoy, Bulacan sang gab-i sang Septyembre 10. Sang Septyembre 13, isa ka lalaki ang nagpalapit sa iya sa sulod sang kampus sang UP kag ginlitrato siya. Pagkagab-i, isa ka itom nga *van* ang nagparada malapit sa iya balay.

Siling niya, tuig 2006 sang makabaton siya sang mensaheng *text* nga nagasiling ara siya sa *order of battle* sang militar sa rehiyon nga sadto sa idalum sang pagpamuno ni Maj. Gen. Jovito Palparan. Agosto 2007 sang tuyon sang pila ka lalaki nga sudlon ang iya puluy-an nga napunggan sang makabugtaw ang iya nga mga kasilingan bangud sa taghol sang iya nga mga ido.

Nobyembre 2007 naman sang ginkadtuan sang mga unipormadong militar ang iya kasilingan. Ginpangita si Reyes sang mga ini kag tuyo nga bayaran sang P20,000 ang iya kasilingan kabaylo sang impormasyon sa iya nahamtangan. Sa panahon man nga ini nag-untat ang regular nga paghanas ni Reyes sang mga bataon nga manunulat sa Hagonoy bangud sa mabaskog nga harassment sa ila sang militar. **AB**

Gindukot nga aktibista, nakita sa kampo sang AFP

Nakit-an sang iya mga pamilya sining Septyembre 17 sa kampo sang militar sa Cagayan si Noriel Rodriguez, 26, katapo sang Anakbayan. Si Rodriguez nakit-an napulo ka adlaw pagkatapos siya gindukot. Ginkulong siya sa mga kampo sang 17th IB sa Barangay Masin, Alcala, Cagayan. Marka sa lawas sang aktibista ang tortyur nga naagum niya sa kamot sang militar.



Septyembre 6 sang gindukot sang mga armadong lalaki si Rodriguez sa Gonzaga, Cagayan. Nagkadto ang iya pamilya sa Commission on Human Rights (CHR) sadtong Septyembre 17 kon sa diin nahibaluan nila halin sa isa ka imbestigador sini nga si Rodriguez nakadetine sa kampo sang 17th IB. Sang kadtuan sang pamilya ni Rodriguez kag apat nga representante sang CHR ang kampo, ginsiling ni Lt. Col. Lawrence Mina, hepe sang 17th IB nga si Rodriguez katapo sang Bag-ong Hangaway sang Banwa (BHB).

Suno sa ginsumpaan nga pahayag ni Rodriguez, gusto sang militar nga ibutang ang iya *thumbmark* sa isa ka kasulatan nga nagasaad nga siya nagsurender nga myembro sang BHB. Nabutang sa kasulatan nga upod si Rodriguez sa mga nakaengkwestro sang militar sa Cumao, Gattaran, Cagayan kag gani wala siya ginpalukpan sang militar bangud siya ila kuno nga *asset*. Ginbitay siya sang militar sang magbalibad siya nga ibutang ang iya *thumbmark* sa kasulatan. Ginhigtan siya sa liog kag ginbutong ini pataas samtang ginauyatan kag ginabutong naman sang isa pa ka suldado ang iya lawas paidalom.

Sa sulod sang 30 minutos gin-

huyupan ang iya nawala nga dulunggan gingamit ang isa ka *straw* samtang ginatakpan ang iya bibig kag natuo nga dulunggan. Ginsakit man siya sang mga suldado sa sulod sang salakyan. Isa ka suldado man ang nagkasa kag nagtaya sang kalibre .45 sa likod sang iya ulo. Ginpahog siya nga patyon, upod ang iya pamilya. Ginsipa kag ginsumbag si Rodriguez sa sulod sang isa ka adlaw. Pilit ginpatudlo sa iya ang isa ka kampo sang BHB. Napilitan nga magpirma sa kasulatan si Rodriguez bangud sa grabe nga pagpaantus sa iya sang mga suldado.

Pagkatapos buy-an sang mga suldado, nagbyahe si Rodriguez kag ang iya pamilya pakadto sa Manila upod ang CHR kag isa ka grupo sang mga suldado sa pagpamuno sang isa ka Colonel Matutina. Ginhatagan sang militar si Rodriguez sang isa ka *cellphone* kag SIM para makontak kuno siya para sa ginapagwa sang militar nga trabaho niya bilang *asset*. Gingwardyahan sang militar sa byahe si Rodriguez tubtob sa iya balay kon sa diin 30 minutos nga nagpabilin kag nagtiyog ang mga suldado. Ginkuhaan sang mga litrato ang balay lakip ang nakakwadro nga laragway sang mga pakaisa niya.

Ginpakamalaut sang Tanggulan



Youth Network for Human Rights and Civil Liberties ang CHR sa pahayag sang upisina sini sa Cagayan Valley nga natapos na ang kaso makaligad nga buhian si Rodriguez. Gin-atake sang Tanggulan ang CHR bangud nahibal-an sini nga uyat sang militar si Rodriguez apang wala ini sang ginhimo antes pa nagkadto ang mga pamilya ni Rodriguez sa upisina sini.

Samtang, sa Iloilo, gindakop sang mga tropa sang 82nd IB Philippine Army si Jose Gabion kag asawa nga si Rosemarie, pareho nga mga mangungu-

ma kag residente sang Barangay Tigbanaba, Igaras. Pagkaaga, ginpagwa sa midya sang militar ang mag-asawa amo kuno ang nagtudlo sa kampo sang BHB sa Sityo Tigbasa nga sakop sang Barangay Tigbanaba. Bisan pa man, saksi ang mga tagabaryo nga tumang ka layo sang balay sang mag-asawa sa nasambit nga kampo kag wala sila sang ihibalo diri. Bangud nga napaslawan ang militar sa ila nga tuyo pilit nila nga ginpaako ang mag-asawa nga sila mga katapo sang BHB.

AB

Mga Lumad sa Talaingod, biktima sang pagpang-abuso sang militar

Lapnagon nga pang-abuso sang militar sa tawhanong kinamatarung sang mga Lumad Ata-Manobo ang nabuyagyag sa pagpanayasat nga ginhimo sa Talaingod, Davao del Norte sang Sept. 15. Gintigayon ini sang mga Lumad kag mga tagasakdag sang tawhanong kinamatarung kag kalinungan bilang sabat sa mga report sang paglapas sa tawhanong kinamatarung nga nakaabot sa PASAKA Confederation of Lumad Organization kag Solidarity Action Group for Indigenous Peoples.

Nag-umpisa sang Agosto ang militarisasyon sang 60th IB-10th ID sa katuyuan nga bungkagon ang Salugpongan Ta Tanu Igkanugon. Ang grupo nga ini isa ka dekada na nga nanindugan kag nagabato sa dalagko nga kumpanyang nagadambong sa ila mga dutang palanublion. Naglab-ot sa 40,000 ekaryas sang dutang Talaingod ang nakatalana himuon nga talamnan sang kape sang Nestle Philippines Inc. Napirmahan na ang Memorandum of Agreement sa tunga sang reaksyunaryong gubyrno kag sang kumpanya.

Base sa imbestigasyon, naglabot sa 22 tropa sang 60th IB ang nagakampo sa Sityo Dulyan, Barangay Sto. Niño samtang ang mga tropa sang Community Assistance Development (CAD), nga anay Reengineered Special Operations Team, sa Sityo Bagang, Banwalay, Bugni,

Laboo, Laslasakan, Nasilaban kag Sambolongan sa Barangay Palma Gil. Bangud diri, biktima ang mga Ata-Manobo sang pagpangwasak sa ila pagkabutang, paghalughog sang ila mga puluy-an, pamwersa, pagpamahog, pagpang-ipit, kag paglapas sa mga kinamatarung sa hilway nga paghulag, pakipag-angot kag pagpahayag.

Ginakampuhan sang militar ang mga buluthuan. Nagatuga ini sang trauma sa pamatan-on kag komunidad. Gin-isa-isa sang mga suldado sa pangunguna nanday Lt. Dennis Ayungo kag Sgt. Christopher Oliveros ang mga balay kag ginhambalan sila nga indi paeskwelahon ang

mga bata sa Salupongan Ta Tanu Igkanugon Community Learning Center samtang gina-akusahan nga mga komunista kag peke ang mga titser diri. Masami nga ginapahog, gina-ipit kag gina-imbestigar sang mga suldado ang mga titser.

Ginpangguba man sang mga suldado ang mga pananom kag kudal sang mga talamnan. Pwersahan man nga ginapahimo ang mga Lumad sang ila mga kasilyas kag ila mga payag. Pwersahan man nga ginapaentra sa Barangay Defense System, CAFGU, Civilian Volunteer Organization o Bagani Force ang mga tagabaryo. Bangud diri, nauntat ang mga rekrut sa ila pagtrabaho nga nagatuga sang malaparan nga kagulutmon sa lugar.

Pilit nga nagapasilabot ang militar sa imbestigasyon. Ginpunggan sang mga suldado nga hilway nga makapahayag sang natabo ang mga Lumad. Tatlo ka oras nga idinetine ang mga katapu sang tim nga nag-imbestiga amo nga naatrasar sila sa ila pagpauli. Ginsita man ang mga drayber sang tim. Ginpasugtan lamang nga makapauli ang tim sang nahibal-an sang mga suldado nga ginatalakay na gali sa radyo ang insidente kag pila na ka kagawad sang midya ang nakahibalo sa natabo sa tim.

AB





Rehimeng Arroyo, naglapas sa kinamatarung sang mga mamumugon—ILO

Maathag nga ginlapas sang gubyernong Arroyo ang mga basehang kinamatarung sang mga mamumugon nga Pilipino. Ini ang resulta sang pagpangusisa nga ginhimo sang United Nations International Labor Organization (ILO) nga ginhiwat sa Manila sang Septyembre 22-29 bahin sa mga kaso sang pagpamigos, pagpamahog kag pagpatay sa mga lider kag katapu sang mga unyon sa idalum sang Kilusang Mayo Uno (KMU).

Sa partikular, ginlapas sang rehimeng Gloria Arroyo ang ILO Convention 87 on Freedom of Association (kinamatarung nga magtukod sang mga asosasyon) kag ILO 98 On the Right to Organize and Collective Bargaining (kinamatarung nga mag-organisa kag kolektibo nga makignegosasyon). Ginsiling man sang ILO nga dapat pamatud-an sang rehimen nga wala nagapartisipar ang gubyerno sa anuman nga pagpamatay sang mga lider-obrero. Pila ka panugyan nga layi ang ginhingyo sang ILO nga ipasar para mas labi nga protektahan ang obreros batuk sa kalakasan. Nagtambong ang mga biktima, pamilya kag mga organisasyon sa idalum sang KMU sa mga pagbista nga ginpangunahan sang ILO.

Naglab-ot na sa 92 ka lider-obreros ang ginpatay sang gubyernong Arroyo halin nga magpungko sadtong 2001. Anum naman ang nakapreso subong kag pila ka unyon ang ginapigos sang estado. Suno sa KMU, maathag ini nga pagtapna sa kahublagang mamumugon kag dapat imbestigahan.

Upod sa pila ka kaso amo ang masunod:

1. Pagpatay kay Diosdado "Ka Fort" Fortuna, lider sang Nestle

Workers Union sa Laguna. Ginpatay siya sang mga armadong lalaki sang Septyembre 22, 2005 sa atubang sang piketlayn.

2. Pagpatay sang mga pwersang paramilitar sang Hacienda Myrianne kay Armando Dolorosa, ikaduha nga pangulo sang National Federation of Sugar Workers (NFSW) sa Negros Occidental sadtong Hunyo 6, 2008.

3. Pagkamatay sang duha ka mamumugon sa presoan sa Cainta, Rizal matapos magbalatian kag dingutan sang mga basehang kinahanglanon. Upod sila sa "Karnation 20" nga ginpreso kag ginpasakaan sang mga himu-himo nga kaso sang ila maneydsment.

4. Pagsukot kay Rogelio Concepcion, lider sang unyon sa

Solid Enterprises sa San Ildefonso, Bulacan sang Marso 2006. Indi pa siya makita asta subong.

5. Pagpamaril kanday Vicente Barrios, presidente sang Nagkahiusang Mamumuno sa Suyafa Farm (NAMASUFA) sa Compostela Valley, kag upod niya nga si Jerson Lastimoso sadtong Disyembre 2006. Napatay si Lastimoso samtang nakaluwas naman si Barrios.

6. Pagkapilas ni Nicanor Briones, presidente sang NFSW sa Camarines Sur, matapos luthangon sang duha ka nakasakay sa motor-siklo.

7. Pagkapilas ni Joel Ascutia, pangulo sang CONDOR-PISTON sa Bicol, matapos luthangon samtang nagahanda para sa welga sang transportasyon sadtong Hulyo 13, 2009.

Ginreklamo naman sang Pagkaka-isa ng Manggagawa sa Timog Katalugan (Pamantik) ang pagbungkag sa ila welga kag pagpangharas sa mga mamumugon. Upod diri ang makahas nga pagbungkag sa piketlayn sang Sun-Ever Light Electronics Company sa Cavite sang 2004, kon sa diin isa ka babae ang malubha nga napilasan matapos sila atakehon sang mga elemento sang Special Warfare Action Group (SWAG), mga pulis kag gwardya. Ginapatuman ang polisiya nga *no union-no strike* sa mga *export processing zone* gani malala ang kalakasan nga ginaagyan sang mga mamumugon diri.

Sa Antipolo, Rizal naman, nagpatindog sang detatsment ang 16th IB sa Robina Farms, isa ka babuyan nga ginapanag-iyahan sang mga Gokongwei para mangharas kag maglunsar sang kampanya kontra unyon. Ginapasibangdan sang mga sulda ang pila ka obrero nga myem-



bro sang Bag-ong Hangaway sang Banwa. Kasan-o lang nagbaton sang bag-o nga mamumugon ang babuyan nga mga anay suldado kag ahente sa paniktik agud pahipuson ang nakatindog nga unyon.

Nagalab-ot naman sa 250 myembro sang unyon sa Nestle sa Laguna ang ginpasakaan sang mga himu-himo nga kaso bunga sang walo ka tuig nila nga welga.

Sa Southern Mindanao, aktibong nagaentra ang mga suldado sa kampanyang kontra-mamumugon. Pila lamang diri ang pagpaniktiktik sa upisina sang Dolefil Union sa tunga sang ila negosasyon para sa *collective bargaining agreement*. Naglunsar man sang kampanya kontra-union ang mga suldado paagi sang pagisi sa mga istrimer kag pagpinta sa pader sang mga islogan nga nagapakalain sa mga lider sini. Nagpatawag naman sang isa ka miting ang mga suldado sang 28th IB sa pabrika sang Fresh Banana Plantations para ganyaton ang mga mamumugon nga indi mag-entra sa Unyon sang Nagkahiusang sa San Jose nga katapu sang KMU.

Sa Cebu, ginpaskil sa pabrika ang mga litrato sang trenta ka myembro sang Anita's Home Bakeshop Workers Union (AHBWU) nga ginapasibangdan nga mga terorista. Aktibo man ang kontra-komunista nga Alliance of Nationalism and Democracy (ANAD) batuk sa AHBWU kag ini ang nagapangu-na sa pagpanagtag sa mga mamumugon sang mga polyeto nga nagaunod sang mga kabutigan.

Pila lamang ini sa mga kaso nga ginplastar sang KMU sa ILO. Nagasalig ang KMU nga makaagum sang maayo nga rekomendasyon ang ILO sa pangkalibutanon nga komunidad kag matum-ukan ang gubyernong Gloria Arroyo nga siya ang may padihot sang amo nga pagpamigos. AB

Lider sang unyon, gin-aresto sa Rizal

Gin-aresto sang Septyembre 21 si Declard Cangmaong, 36, lider sang unyon sa pabrika sang bayu sa Calamba, Laguna. Nadakup siya sa Barangay San Isidro, Angono, Rizal sa tingob nga operasyon sang militar kag pulis sa akusasyon nga siya myembro sang BHB sa Mindanao may P1.2 milyon padya sa ulo.

Ginkundenar sang Pagkakaisa ng Mangggawa sa Timog Katagalugan (Pamantik) ang pagdakup kay Cangmaong kay siya lider-union kag indi katapu sang BHB.

Sang temprano nga bahin sang Septyembre, ginkadtuan sang mga ahente sang 66th IB kag Workers for Industrial Peace

and Economic Reform (WIPER) ang lain-lain nga *packing plant* sa Maragusan, Compostela Valley. Ginpilit nila ang obreros sang Maragusan United Workers Union nga maghalin sa NAFLU-KMU. Nagpagwa sila sang bidyo, hatag oryentasyon kag nagpakalain kay Romualdo Basilio, lider sang KMU. Nanagtag sang mga polyeto ang mga ahente nga may nakasulat si Basilio kuno "ligal nga prente sang CPP/NPA."

Ang WIPER makinarya sang militar nga may katuyuan nga bungkagon ang militanteng mga unyon kag maghimo sang bag-ong unyon nga igapaidalum sa TUCP nga ginauyatan sang reaksyunaryong gubyerno. AB

3,000 mamumugon kag mga residente, nagprotesta

Masobra 3,000 ka mamumugon sang North Harbor kag mga residente sang mga komunidad malapit sa dulungkaan ang nagmartsa sadtong Septyembre 21 pakadto sa Mendiola para ipamilit ang kasiguruhan sa trabaho sa atubang sang nakatalana nga pribatisasyon sang piyer. Ang martsa ginapamunuan sang Alliance of Port/Transport Workers and Porters in North Harbor (APTWP-NH). Ginsuportahan sila sang lain-lain nga mga organisasyon sang mga marino, manuglibod kag nagapuyo sa dulungkaan. Sadtong Septyembre 15, tatlo ka libo nga mamumugon ang nagmartsa man sa Mendiola para magprotesta.

Ginpamilit nilang bag-uon ang Terms of Reference sang pribatisasyon bangud duha ka tuig lang ang gintalana nga garantiya nga pwede magtrabaho ang obreros sa piyer matapos mahatag ang kontrata.

Indi magnubo sa 7,000 mamumugon, manuglibod, mga drayber kag iban pa sa dulungkaan sang North Harbor ang mawad-an sang trabaho bangud diri. Kapin 100,000 ka pamilya nga nagapuyo malapit sa dulungkaan ang nagaatubang sang demolisyon.

Indi kami mag-untat sa pagmobilisa sang linibo ka tawo pakadto sa Malacañang asta nga wala kami sang kasiguruhan sa trabaho, pahayag ni Jake Azores, presidente sang APTWP-NH kag United Dockhandlers, Inc., isa ka lokal nga unyon. Samtang naglunsar sadtong Oktubre 1 sang untat operasyon ang mga mamumugon sang piyer kag mga residente sang North Harbor. Naparalisa nila sang tunga sa adlaw ang operasyon sa piyer kag ginbarikadahan ang mga pwertahan sini. AB

Mga empleyado, nagprotesta batuk sa planong relokalasyon

Nagprotesta ang mga katapu sang Social Welfare Employees Association of the Philippines (SWEAP) sadtong Septyembre 18 sa plano nga pagsaylo sang duha ka pangpublikong institusyon nga buhat-sa-kaluoy. Tuyo nga isaylo sang gubyrno ang Golden Acres Home for the Aged (GA) halin sa pwesto sini sa Bago Bantay, Quezon City pakadto sa Tanay, Rizal. Ginapamatukan man nila ang plano nga pagsara sang Reception and Study Center for Children (RSCC).

Ang ginatindugan sang GA kag RSCC sakop sang Quezon City Central Business Project (QC-CBP), nga tuyo nga ibaligya sang gubyrno sa mga pribadong *developer* para makitaan. Kabaylo sini palayason ang masobra 227 ka katigulangan nga nagaestar sa GA kag mga lapsag kag bata nga ginaserbisyuhan sang RSCC, isa ka balay-ampunan.

Suno sa SWEAP, isa ka unyon sang mga empleyado sang DSWD nga myembro sang COURAGE (Confederation for the Unity Recognition and Advancement of

Government Employees), ginapamatukan nila ang gulpi nga pagabandona sang gubyrno sa obligasyon sini nga magmentinar sang malab-ot nga ikasarang nga mga pasilidad para sa abandonado nga katigulangan sa National Capital Region.

Indi man magsugot ang mga katigulangan nga sayluhon sila bangud sa kalayuan sang Tanay halin sa ila mga himata. Luwas diri nagakabalaka sila sa kalapiton sa Camp Mateo Capinpin, kon sa diin regular nga may ginahiwat nga treyning

militar. Siling nila nga mahimo sila nga maigo sang mga nagtalang nga bala kag maisturbo sila sa gahod sang mga kanyon. Mapalayo man sila katama sa mga ospital kag iban pang serbisyo medikal nga makitan lamang sa Metro Manila.

Ginatun-ukan man sang mga empleyado sang GA nga indi tanan nga mga kliyente sini ang mapasulod sang bag-ong pasilidad sa Tanay. Nagakabalaka sila nga ang tuyo sang pagsaylo sa duha ka institusyon magaresulta sa mada-mo nga pagpahalin kag pagresayn sang mga empleyado bangud sa kalayuan sini sa Metro Manila.

Maglunsar ang SWEAP sang ser-ye sang mga aksyong protesta batuk sa plano nga pagsaylo. Ang amon paghimakas batuk sa pribatisasyon kag komersyalisasyon amo ang paghimakas para proteksyunan ang serbisyo sosyal nga dapat magum sang pumuluyong Pilipino, suno kay Ramon Loza, pangulo sang SWEAP. **AB**

BAYAN kag ILPS, naghiwat hublag protesta kontra G20

Naglunsar ang Bagong Alyansang Makabayan kag International League of Peoples' Struggle-Philippines sang isa ka martsa protesta pakadto sa US Embassy para pamatukan ang Group of 20 Summit nga ginhiwat sang Septyembre 24-25 sa Pittsburgh, Pennsylvania sa US.

Ang G20 ginabug-os sang 19 pinakadaku nga ekonomiya sa kalibutan kag sang European Union.

Ginkundenar sang BAYAN ang G20 bangud wala sang kinamatarung nga idiriher ang pangkalibutanong ekonomiya nga nagahapa sa pinakamalala nga krisis halin pa sang 1930 Great Depression.

Bangud indi sini sakup ang ginatos ka pungsod kag binilyon nga tawo, makitid ang adyenda nga ginatalana sang G20 kon paano luba-

ron ang krisis.

Suno man sa BAYAN, sa baylo nga isulong ang tunay mga reporta para sa pangmadugayan nga solusyon, ginagamit lang sang US kag iban pang pinakamanggaranon kag pinakagamhanan nga pungsod ang G20 Summit para hatagan-rason ang depektibong polisiya nga neoliberal kag mga separado nga multilateral nga institusyon pareho sang International Monetary Fund (IMF) sa ngalan sang pagsolbar sa

pangkalibutanong krisis pangpinansya kag pang-ekonomiya.

Ang mga polisiya nga neoliberal nga ini pareho sang pribatisasyon, liberalisasyon kag deregulasyon ginpanaog sang IMF sa mada-mo nga nagaantos nga pungsod.

Suno sa BAYAN, indi dapat pahangugutan sang mga imol nga pungsod pareho sang Pilipinas nga talanaan sang pila ka manggaranon kag poderoso nga pungsod ang adyenda sa pag-atubang sa pangkalibutanong krisis.

Dapat pamatukan sang mga ini ang panawagan sang G20 para sa dugang pang pagbukas sang ekonomiya sa todo-larga nga baligyaanay, pangapital kag dugang nga kontribusyon sa IMF. Sa Pittsburgh, masobra 10,000 pumuluyo ang nagrali batuk sa G20 Summit. **AB**

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Tuig XL No. 19
Oktubre 7, 2009
www.philippinerevolution.net

Editorial

Sukton ang rehimeng Arroyo sa pagpabaya sa mga biktima sang kalamidad


Lubos nga nagaunong ang Partido Komunista sang Pilipinas (PKP) sa minilyon nga biktima sang malaparan nga pagbaha kag pag-usmod sang duta bunga sang bagyo Ondoy kag Pepeng sa Metro Manila kag mga prubinsya. Sa atubang sang pagkainutil sang gubyerno Arroyo, nagapanawagan ang PKP sa malapad nga pumuluyo nga magbuligay kag maghulag sa pagtibawas sa mga kalamidad kag kabudlayan.

Nagapanawagan man ang PKP sa

tanang nga rebolusyonaryo kag maki-pumuluyong pwersa nga himuon ang tanang nga masarangan para buligan ang mga nahalitan kag labi gid ang nalisdan subong nga pumuluyo. Sa amo man, dapat maghulag ang pumuluyo para sukton ang rehimen sa kriminal nga pagpabaya sa mga biktima kag responsibilidad sini sa malaparan nga kalamidad nga naagyan sang pumuluyo.

Ginpatampok sang husto sang mga kalamidad nga ini ang labi nga pagkainutil sang mga ahensya sang gubyerno nga maghimo sang madasig kag santo nga ayuda sa mga biktima. Sa kasagsagan sang mga baha sa Metro Manila, linibo ang natulod sa bubong sang ila mga balay kag madamo ang pila ka adlaw nga naghulat sa wala nag-abot nga bulig. Madamo ang napatay kag nailo. Nagabukal sa kaakig sa inutil nga gubyerno ang pumuluyo, labi na ang mga naluwas sa kaugalingon nga pagtinguha kag ang minilyon nga nakasaksi sa lapnagon nga pag-antos sa nagligad nga pila ka adlaw.

Ginhingalitan pa sang rehimen ang pamahog sang panibag-ong bagyo agud pwersahan nga bakwiton ang mga imol sang syudad para kuno makalikaw sila sa peligro. Ginadumilian sila subong nga magbalik sa ila mga payag, samtang wala naman sang aregla-



Mga tampok sa isyu nga ini ...

**Bulig sa mga nahalitan
sg bagyo**

PAHINA 3

**Rebolusyong agraryo
sa kubay sg mga
Manobo**

PAHINA 7

**Report sg ILO sa
paglapas sg rehimeng
Arroyo**

PAHINA 14

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com